

PRESENTACIÓN DAS ACTAS DOS II ENCONTROS PARA A NORMALIZACIÓN LINGÜÍSTICA

Susana Mayo Redondo

Arquivo de Planificación e Normalización Lingüística

Amigos e amigas, penso que despois de compartirmos en dúas ocasión ilusión e preocupación, como dicía Valentín García Gómez xa vos podo tratar así, con certa confianza. Máis nos darán as dúas sesións, os dous días de traballo que imos compartir todos e que espero que cumpran as vosas expectativas. Hoxe só estou aquí para presentar a Henrique Monteagudo, director do Arquivo de Planificación e Normalización Lingüística, que vos vai falar doutro dos compromisos que tiñamos adquiridos con vós desde o ano pasado. Xa cumprímo-lo primeiro, estar aquí hoxe de novo, e o segundo era a publicación das Actas dos II Encontros ós que moitos de vós asististes. Eu simplemente vos saúdo, agardo que sexan unhas xornadas proveitosas e de interese para todos e xa lle paso a palabra a Henrique Monteagudo

Henrique Monteagudo Romero

Arquivo de Planificación e Normalización Lingüística

Gracias a Susana Mayo, a quen antes, por un descuido esquecín agradece-lo seu esforzo para a realización destes Encontros.

Vou ser moi breve, para que non comecemos encabalgando o horario e con problemas xa de horas. Fundamentalmente vouvos falar de tres cousas, moi rápido. Unha é a presentación das Actas dos II Encontros que se fixeron o ano pasado. Como dixo Susana, publicar estas actas era un compromiso que tiñamos adquirido, e aquí están. O interese da publicación das actas non é só, nin principalmente, que quede constancia de que se fixeron uns encontros, senón o feito de que unha das carencias que notámo-la xente que estamos a traballar, e particularmente a ensinar, cousas relacionadas coa normalización da lingua, son materiais de referencia, materiais de apoio que sirvan para os que ensinamos, para os que traballan, para os que aprenden e para as persoas en xeral que están interesadas nesta cuestión. Temos pouco material áinda e entón, noutro contexto, ó mellor a presentación destas actas sería menos importante, pero nun contexto de certa penuria de materiais sobre o tema ten un interese especial. As actas recollen a totalidade das intervención do ano pasado e ía falarvos un pouco en detalle delas pero non paga a pena porque as tendes aí e non temos xa moito tempo. Soamente vos quero indicar que iso de que "eu non creo nas meigas pero habelas hainas" pode ser certo. Aquí no Consello debe haber algunha, desde logo, ou ben algún trasgo deses do prelo que se nos escapou para aquí. O caso é que nestas actas a "Introducción" está na páxina 123. Entón, podedes comezar a lelas pola páxina 123 e logo despois volvedes ó comezo. Tendes aí unha fe de grallas que dá conta desta particularidade tan notable.

Á parte das actas quería comentarvos dous cousas que creo que son do voso interese. Lembrades que outro dos compromisos que adquirimos o ano pasado era a creación dunha comisión para o estudio dos problemas da coordinación dos servicios lingüísticos e de normalización lingüística, fundamentalmente os de ámbito local. As cousas "de palacio van despacio", en castelán neste caso, e as cousas de pazo van a modo, pero o caso é que xa a temos, xa está a comisión designada. Vaise constituir inmediatamente e vaise pór a traballar axiña. Compónena Manuel Braña, da Escola Galega de Administración Pública; Xesús Costas, traballador da Administración Local e membro da Ponencia de Lingua do Consello; Xan Comesaña, da Mesa pola Normalización Lingüística; Juan Díaz Villoslada, subdirector xeral de Xustiza e Administración Local; Benjamín Dosil López, subdirector Xeral de Política Lingüística, que nos acompaña hoxe; Adolfo Gacio Vázquez, vicepresidente da Federación Galega de Municipios e Provincias; Evaristo García Canosa, presidente da Sociedade Galega de Desenvolvemento Comarcal; Valentín García Gómez, presidente da Coordinadora de Traballadores e Traballadoras de Normalización Lingüística e Xaquín Monteagudo, da Asociación de Funcionarios pola Normalización Lingüística.

Como vedes, áinda que sempre é discutible a composición destas comisión, aquí o que se pretendeu foi unha representación bastante ampla, tanto representación das asociacións máis de base, cívicas, que traballan no tema, como dos organismos públicos que teñen responsabilidades no asunto. Non vos podo garantir, loxicamente, cales van se-los resultado da Comisión pero o tema está sobre a mesa, as persoas involucradas vano estudiar e esperamos que, como moito, nos IV Encontros poidamos presentar xa solucións e pasos en positivo cara a este asunto que notamos tan importante que é o da coordinación dos servicios lingüísticos e da Administración.

Finalmente, sabedes que outro dos compromisos era o referente á formación de xente que poida traballar cunha mínima solvencia nestes servicios. Aquí facíase un chamamento especial ás universidades galegas pola súa responsabilidade no asunto e vou anunciar xa que temos un compromiso, de momento entre o propio Consello da Cultura Galega e a Dirección Xeral de Política Lingüística, para organizar un curso de mestrado que se vai chamar Sociolingüística Galega, da análise á aplicación e que se vai desenvolver nos cursos 2000-2002. Non teño aínda compromiso, pero estou seguro de que non vai haber ningún problema para que este curso conte coa colaboración das tres universidades galegas e sexa recoñecido nos seus programas académicos. Entón, se isto vai como debe de ir, espero que teña continuidade no futuro e imos ter unha cousa máis que nos vai servir para traballar mellor. En fin, a pequenos pasos faise o camiño, e un pouco nesta liña de ir dando pasos para adiante é no espírito no que vos convocamos aquí e no que pedimos tamén a colaboración de todo o mundo.

PARTE I

A AVALIACIÓN EXTERNA E A XESTIÓN DE CALIDADE

Xaime Subiela Pérez

Xosé Manuel Varela Varela

Valentina Formoso Gosende

Jorge Fente Balsa

Marcos Lorenzo Gallego